
MOCIÓN DO GRUPO MUNICIPAL DE COMPOSTELA ABERTA PARA FACER EFECTIVA A LIÑA DE AXUDAS Á COOPERACIÓN PREVISTA PARA O ANO 2022 E PARA REACTIVAR O CONSELLO MUNICIPAL DE COOPERACIÓN.

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte moción para o seu debate no Pleno:

EXPOSICIÓN DE MOTIVOS:

Durante o pasado mandato, co goberno de Compostela Aberta, o Concello de Santiago impulsou por vez primeira as axudas de Cooperación ao Desenvolvemento, co obxectivo de colaborar na realización de proxectos concretos en países empobrecidos. Con estas subvencións, o Goberno local daba un paso fundamental para cumprir o acordo asinado polo Concello en 1999, polo que se comprometía a destinar o 0,7% do orzamento municipal a cooperación ao desenvolvemento.

A primeira convocatoria de axudas á Cooperación ao Desenvolvemento, dotada con 90.000 euros, quedou resolta en outubro de 2017. A segunda convocatoria, aprobada en agosto de 2018 e resolta en xaneiro de 2019, estivo dotada xa con 120.000 euros. Dela resultaron beneficiarias seis entidades: Fundación Vicente Ferrer, Solidariedade Internacional de Galicia, Amigos da Terra, Asemblea de Cooperación pola Paz, Manos Unidas e Agareso; que desenvolveron proxectos en países como India, Guatemala, Nicaragua ou El Salvador.

Tendo en conta que o goberno do PSOE non foi capaz de sacar a convocatoria do 2019 e que tampouco era capaz de sacar a do ano seguinte, en outubro de 2020, o grupo municipal de Compostela Aberta presentou un rogo no Pleno da Corporación para urxir ao Goberno a convocar as citadas subvencións e que a partida non quedara sen gastar, como acontecera no ano 2019. Na súa resposta, o concelleiro Gumersindo Guinarte sinalou que a súa vontade era a de manter as convocatorias.

Finalmente, a convocatoria de 2020 non chegou a realizarse, e por iso nos orzamentos de 2021 o Goberno local incrementou a partida prevista para as axudas de Cooperación ao Desenvolvemento ata os 220.000 euros, nun intento de compensar a non convocatoria das subvencións nos dous exercicios anteriores. Ese aumento foi, ademais, un dos puntos salientados na memoria das Contas, que sinalaba que *“A política social (servizos sociais, cooperación, política de igualdade) segue a ser un dos principais ámbitos de actuación do goberno municipal”*.

En agosto de 2021, o grupo municipal de Compostela Aberta urxiu ao Goberno a publicar a convocatoria das axudas, trasladando a preocupación da Coordinadora Galega de ONGDs que, naquela altura, non tivera aínda noticias do procedemento. CA reclamaba, ademais, que “no caso de convocar as subvencións, se estimaran uns prazos realistas para a execución dos proxectos, permitindo que os potenciais beneficiarios puideran xustificar os gastos máis alá de 2021, porque doutro xeito sería imposible a súa execución”.

En Novembro do 2021 o grupo municipal de Compostela Aberta interpelaba ao goberno para que explicase os motivos polos que non se tiña realizado a convocatoria de axudas para Cooperación ao Desenvolvemento nos anos 2019 e 2020 e por que se deixaran sen gastar as partidas orzamentarias correspondentes, e para que dera conta das súas previsións para a convocatoria das axudas correspondentes a ese ano 2021. Finalmente, esas subvencións quedaron outra vez sen convocar.

En abril de 2022, a Coordinadora Galega de ONGDs manifestaba rotundamente o seu malestar renunciando a executar o programa municipal Compostela + Solidaria, “por coherencia”, ao constatar que o Concello de Santiago vai camiño de incumprir por cuarto ano consecutivo os seus compromisos coa cooperación ao desenvolvemento e coa loita contra a pobreza, deixando de executar máis de 500.000 euros orzados para este labor no que vai de mandato, nun momento especialmente complicado para os colectivos máis vulnerables. A propia CGONGD emitiu un comunicado, lembrando que o Concello de Santiago puxera en marcha en 2017 e 2018 as convocatorias de axudas para proxectos de cooperación ao desenvolvemento, que beneficiaron a nove entidades galegas que traballaron cuestións como a mellora da calidade educativa, a promoción da saúde, a equidade de xénero, o reforzo das capacidades para mellorar a xestión pública da auga ou o fortalecemento de cooperativas de pescadores e pescadoras, man a man con organizacións locais de Honduras, O Salvador, Guatemala, Nicaragua e India.

O Compostela + Solidaria é un programa municipal de sensibilización e divulgación que os últimos seis anos desenvolveu a Coordinadora de ONGDs en distintos espazos da cidade, situando Santiago como unha referencia á hora de reflexionar ao redor de temáticas como as migracións, a convivencia entre culturas, a emerxencia climática ou o consumo responsable.

A CGONGD representa a 45 entidades, que aglutinan a máis de 25.500 persoas entre socias, voluntarias e traballadoras e que operan cada ano en máis de 20 países co obxectivo de mellorar as vidas de máis de 400.000 persoas, a maioría delas mulleres, nenas e nenos. Está integrada na coordinadora estatal e coñece ben o esforzo en cooperación e solidariedade que fan as distintas entidades locais, autonómicas e estatais, na medida das súas posibilidades. É, precisamente, o seu papel dentro das redes de cooperación de Galicia e do conxunto do Estado o que obriga a Coordinadora a renunciar a colaborar no programa municipal Compostela + Solidaria, “por coherencia”, ata que o Concello de Santiago cumpra os compromisos que ten adquiridos na loita contra a pobreza e contra as desigualdades globais.

Polo tanto, todo apunta a que **2022 será o cuarto ano consecutivo no que o goberno do PSOE no Concello de Santiago se recoñecería incapaz de executar o orzamento comprometido para a**

solidariedade e a loita contra a pobreza nunha convocatoria que se vén desenvolvendo sen problemas dende hai anos noutros concellos, como o de Lugo, e noutras administracións como as Deputacións da Coruña e de Pontevedra.

A esta situación de pasividade e paralización administrativa, súmase o feito de que dende a chegada de Bugallo á alcaldía e de Sindo Guinarte á concellaría, non se volveu convocar o Consello Municipal de Cooperación do Concello de Santiago, o espazo de participación cidadá que contaba coa participación activa dos distintos grupos políticos municipais e de axentes de cooperación como as ONGD, representantes das asociacións veciñais, da Dirección Xeral de Relacións Exteriores da Xunta de Galicia, do Consello Económico e Social, do Foro Cívico, do Servizo de Participación e Integración Universitaria da USC, do Fondo Galego de Cooperación e Solidariedade e do Foro Galego de Inmigración.

Por todo o anterior, e porque a capital galega ten que estar á altura do que demanda a cidadanía, aínda máis no actual contexto internacional, no que non podemos permitirmos perder, por falta de capacidade de xestión e por cuarto ano consecutivo, o orzamento destinado á loita contra a pobreza e á cooperación ao desenvolvemento, o Grupo Municipal de Compostela Aberta, propón o seguinte

ACORDO:

- **O Pleno da Corporación insta ao correspondente órgano de goberno a facer efectiva a liña de axudas á Cooperación ao Desenvolvemento prevista para 2022 e reactivar o Consello Municipal de Cooperación.**

En Santiago de Compostela, a 20 de Maio de 2022


María Rozas Pérez

Concelleira do Grupo Municipal de Compostela Aberta


GRUPO MUNICIPAL

Á ATENCIÓN DO ALCALDE DE SANTIAGO